

LIBRU DECIMU

Cunciliu di li Dei

Lu patri Giovi, ch'é lu cummannanti
in capu di l'Olimpu e di la terra
vistu lu gran casinu ca nto Laziu
c'era e nun era ascrittu di lu Fatu,
di piscari Giunoni cu li manu
in pasta mentri la spada maniava
a Turnu e trafficava sutta sutta
cu l'infenali Allettu e l'autri dei
nta lu Tartariu munnu cunnannati,
pruclama lu cunsigghiu generali
di li divinitati di l'Olimpu.
Esattamenti comu lu cunsigghiu
di li nazioni uniti veni fattu
quannu ci sunu cuntrastanti fatti
tra populi diversi di la terra.
In viritati c'é da diri intantu,
ca Giovi patri lu putiri aveva
di fari 'n-soccu voli, datu ch'era
suvranu assolutista e pussissuri
incuntrastatu e sulu di li lampi,
ma, nonostante stu fatturi estremu,
Iddu facia di tuttu pi cimmari
li spiriti divini, pienamenti
certu ca pi ristari a galla devi
truvare u modu e la manera giusti
pi lassari cuntenti a tutti pari!
Pi chistu indici sempri concistori,

ca siddu lu palazzu s'arribella
sunu amarizzi duri a digiriri.
Li dei chiamati a dari soluzioni,
si sfoganu parrannu e su' custretti
ad accittari lu cumuni edittu.
Quindi sti cuncistori sunu sempri
sulenni e furmalisti, e li cunsensi
diventanu decreti senz'appellu.
Puteva certu nta stu casu a Giunu
puniri cu la virga si vuleva,
ma nun ci cunvineva ed era megghiu
tinirla sutta scupa e cosi sia!
A frotti s'affuddaru li putenti
divini abitaturi di l'Olimpu
ad occupari l'apparati scanni,
in forma circolari dispunuti.
Accantu a Giovi Veniri s'assetta
e Giunoni di l'altu latu postu
pigghia, ca daccussì l'Onnipotenti
si trova a centru di l'interessati
e tutti po' squadrari cu la vista.
Quannu assittati foru, discurrennu
di futili cusuzzi d'ogni jornu,
arriva Ganimedi cu la brocca
e servi a tutti nettari ed ambrosia.
Finuti di libbari, Giovi batti
li manu a tempu e tutti li prisenti
all'attenzioni invita e dici: - Figghi
divini di lu celu e mei, vinuti
a parlamentu cu sulerzia e prescia,
vi vogghiu diri ca putenti semu

ognunu nto so ramu nta li cosi
 di lu tirrenu munnu e di lu celu,
 ma tegnu a diri ca nun esti chista
 la cosa da capiri pirchè tutti
 sapemu compiti, putiri e noti
 d'ogni Diu cca prisenti. Ma la cosa
 ca forsi nun ha statu recepita
 é ca putemu tuttu, ma non contru
 lu Fatu ch'é suvrano e detta liggi.
 (Guarda sottocchi la mugheri Giunu,
 comu pi diri: ascuta attentamenti,
 ca stu discursu ti riguarda in chinu!)
 Nui, padreterni, nun putemu nenti
 scumpaginari di l'apparicchiatu
 sorcu ca fu tracciatu di lu Fatu.
 Semmai chiamati semu a secundarlu.
 Pirtantu sbagghia cu' s'opponi a forza
 a la teucra trasuta nta lu Laziu,
 pirchè sta scrittu e nun si po' sfatari
 ca di ssu fattu ni deriva Roma
 e tuttu chiddu ch'é rumanu in terra!
 Pi chistu Troja fu distrutta e giaci,
 pi chistu Enea salvatu vinni e vivi.
 Lu fari sangu, l'ammazzari in guerra
 nta stu casu mi pari furzatura.
 Tra nui parramu di stu fattu e speru
 ca fora nesci nu decretu giustu
 su quantu s'havi a fari oppuru noni.
 Veniri adergi di lu scannu e dici:
 - Sugnu d'accordu sommu patri Giovi!
 Lu Fatu s'havi a fari prusiguiri

ed ju nto campu scinnu a favuriri
la futura rumana putistati. -
Comu s'assetta Veniri, Giunoni
adergi cu la facci viridi e dici:
- Cu quali facci parri, tu ca si'
la vera prima causa di sta storia
accuminciata cca! Di quali Fatu
vai cianciannu ca Troia fussi ancora
si tu non pirittevi di rubari
a Sparta la muggheri di l'Atridi
a lu trujanu Paridi in pritisa?
Cunflittu d'interessu inoltri accucchi,
pirchè si' matri d'Enea naturali.
(Comu viditi puru nta l'Olimpu
esisti lu conflittu d'interessi,
di cui si parra e nun si sapi mai
quali sunu li pisci di pigghiari
e chiddi di lassari puru ddocu!)
Ju in terra scinnu, ca nun s'havi a fari
nautru delittu tipu Sparta a Turnu
ca cu Lavinia storia aveva prima. -

Discurdanzi e decretu di Giovi

In du partiti li Dei si sparteru,
ca c'era cu Afroditi e cu Giunoni
argumintannu sustineva, certu
non pi giustizia, ma pi cunvinienza.
Cunflittu c'era d'interessi é veru,
ma chi ci azzicca si lu Fatu é chiddu?
E chi forsi Giunoni nun aveva
lu dirittu d'aviri lu sustegnu
a lu so Numi? Chistu voli u Fatu?

Ognunu parra e sbommica discursi
opposti e sdisinsati senza dari
la giusta soluzioni a lu prublema
ca stabilisci lu cunfini veru
tra Fatu scrittu e putistà divina!
Pirtantu é giustu e nun é giustu
lu cuntrastari tra Latini e Teucri,
a secunna di chistu e chiddu Diu!
Sintuti li pareri sona Giovi
la campanedda ed azzittisci a tutti.
Indi si susi ed accussì decreta:
- Tinutu cuntù ca lu Fatu vanta
dirittu imprescrittibili d'aviri
accadimentu certu e nui divini
putenza nun avemu di cangiarlu,
vistu ca li pareri su' discordi
supra la guerra tra Latini e Teucri,
conformementi a quantu sempri fattu,
decretu ca l'Olimpu tuttu resti
fora di sta vicenda e ca lu Fatu
sia la vilanza sula di li fatti.
Nun é cuncessu a nuddu d'intralciami
lu corsu di l'eventi e così sia! -
Comu sempri pulemichi ci foru
tra l'abitanti di l'Olimpu sciolti.

Arrivanu i nostri!

Intantu nta lu lidu li Latini
assaltanu cu sempri chiù furori
li poviri mischini di li Troj,
ca quasi sunu cu li pedi a moddu
nta lu lidu, accerchiati di li truppi

confederati di lu Laziu tuttu.
Giunoni gongolanti lu scenariu
guarda e già pensa ca vincivu Turnu,
ma d'impruvvisu nta lu ciumi Tebru
na flotta cumparivu di tuscani,
guidata a centru da li navi lici,
chini d'arceri ed outra truppa,
ca non sulu Tarconti puru Pisa,
Chiusi, Cereta, l'Elba, Populonia
e Mantua a frotti s'accudaru contru
l'ostili populu latinu e Turnu.
Puru Pallanti avanza nta lu boscu
cu li cavaddi e li surdati etruschi.
L'Anchisidi lu scudu in susu leva
contru lu sulì riflittenti e grida;
'n-lampu si vitti nta lu celu comu
si Giovi pluviu a scunquassari stassi
e celu e mari ca l'orditu scudu
centuplica la luci di lu sulì.
Lu gridu trova rispundenza pronta
tra l'assaltati schierì nta lu lidu
ca contrattaccu sferranu viulentu.
Turnu s'avvedi di li navi e grida:
- N'assisti Giovi ca lu lazzaruni
ni manna friscu friscu nta la riti!
Supra lu bagna-asciuga havi a muriri
assemi a li briganti comu ad iddu. -
Però non sapi ca stu bagna-asciuga
di l'itali cuntradi nun é bonu
pi fari resistenza a cu' ci arriva,
ca si capivu sulamenti quannu

Benitu fascistuni lu scuprivu!
 Indi na squadra manna risuluta
 contru la prima navi ca s'accosta
 e si sfascia 'mpicannu nta li scogghi.
 S'adduma nta la ripa na battaglia
 tra Rutuli c'assaltanu ed etruschi
 ca vomita la navi in sichitanza.
 Enea prutettu di lu scudu accurri
 e cu la spada attornu stragi faci.
 Sutta li colpi di la santa spada,
 Lica, Terone, Gia, Faru e Cisseu
 morti stinnuti restanu nta terra.
 Ribbummanu nto scudu i setti dardi
 da setti frati assemi rifilati,
 ca Veniri pinsavu a cuncintrarli
 nta ssu fatatu puntu, nonostante
 di Giovi surdu e mutu lu decretu.

Morti di Pallanti

Nta nautru puntu di lu lidu Alesu
 accurri assemi a Messapu giganti
 contru Pallanti e l'Arcadi assaltanti,
 ca venunu bluccati ed anzi arrieri
 spingiuti sunu cu l'astati ferri.
 Pallanti allura li rincora a vuci,
 Lagu trafiggi, Isbone e li gemelli
 Timbru e Larudi. D'impruvvisu Lausu
 lu squadra di luntanu ed iddu puru
 torvu lu guarda. Currunu li dui
 circannusi a vicenda pi pugnari,
 ma lu distinu ca d'iddi già sapi
 la sorti, l'alluntana senza menu,

ca Turnu grida di lassari ad iddu
lu scontru cu Pallanti pi puniri
lu padri Evandru di lu tradimentu
ca cunsumavu contru Grecia e Lazio.
Pallanti avanza curaggiusu e forti
senza timuri d'affruntari a Turnu
lu chiù pussenti Rutulu nto campu.
Lu picciutteddu replica all'accusi,
ca facissi di menu u fanfaruni
e ca pinsassi tostu a la parata
di l'assistata lancia ca ci jetta.
Lu dardu di Pallanti nta lu scudu
s'azzicca di lu rutulu e lu fora,
ma nun ferisci l'omu ca sfirranu
lu colpu di risposta nta lu pettu
lu picciutteddu azzicca ca stramazza.
Svillennu l'asta accuminata Turnu
grida: - Ad Evandru ripurtati u figghiu
ca la so morti é sufficienti a dari
giustu cumpensu a tradimentu fattu.
Donu ci fazzu di la sipultura
e sugnu puru ginirusu e giustu! -
Accussì dici ed a Pallanti scippa
lu balteu ca pinneva di lu coddu
e si ni fregia cu spavalderia.
Giungi veloci di dda morti l'ecu,
ch'era Pallanti canusciutu e notu,
ad Enea, ca cicatu di duluri
nto campu cerca d'arrivari a Turnu.
Comu un turrenti ca travolgi tuttu
e tuttu ammogghia cu viulenza estrema

lassannu arreri morti e distruzioni,
 tali rigatu lassa lu tirrenu
 Enea di sangu e spirtusati corpi.
 Chiù di cinquanta cascanu murenti
 sutta li colpi di la spada atroci
 ca nun pirduna e mancu duna requie,
 ma Turnu nun s'attrova nta lu campu,
 ca pari c'abbulavu nta lu celu,
 ne ritruvari lu puteva in quantu
 Giunoni avia scinnutu di l'Olimpu
 e trasportatu nta lu patri Daunu.

Giunoni salva Turnu

Quannu Giunoni vitti lu fururi
 d'Enea e li morti siminati d'iddu,
 cunvinta ca la fini avissi statu
 di Turnu senza menu nta ddu jornu,
 Circavu a Giovi nta l'Olimpu e dissi:
 - Lu to cumandamentu di lassari
 ca scurrunu l'eventi comu Fatu
 voli, mi duna pena immensa o Giovi.
 Lu sacciu ca lu Fatu nun si cangia,
 ma ca si poti ritardari leci!
 Volgi lu sguardu nta lu campu dunnì
 si staci cummattennu e guarda a Turnu.
 Ju vogghiu sulamenti ritardari
 la morti ca lu Fatu decretavu
 di st'eroicu picciottu ca m'é caru.-
 - Va beni!, dissi Giovi, ma fa prestu
 e soprattutto nun esagerari! -
 Grata Giunoni, in terra scinni e pigghia
 l'aspettu fisicu d'Enea, ca fingi



*Lu fintu Enea
s'addentra
nta na navi ...*

d'evitari lu scontru contro Turnu.
- E chi fa scappi?, dissi Turnu allura,
tu, c'assicuti fimmini, mi scappi?
Ju non ti moddu fin'a ca non mori
pi manu mia nta stu precisu jornu! -
Lu fintu Enea s'addentra nta na navi,
lu segui Turnu senza dari tregua,
ma la navi si movi e sula curri
mentri ch'Enea scumpari ed Era appari.
La Dea ci dici di purtarlu a casa
pi salvarlu di la sicura morti.
Si tira li capiddi Turnu e chiangi,
ca sta scappannu senza ca lu sapi,
pirdennu facci ed onoratu vantu!

Morti di Lausu e Mezenziu

Mezenziu etruscu, a Turnu scumparutu
subentra cu putenza e stragi faci
di nimici chiamannu a vuci Enea.
- Nun t'ammucciari, dici, fimmineddu
teucru, capaci sulu di scappari
e d'acchiappari fimmini indifesi! -
E daccussì dicennu assesta colpi
di spada e di murtali mazza. Quannu
davanti cumparivu Enea lucenti
d'armi e di scudu - Finalmenti, dissi,
ti vidu bruttu latru. St'armi vogghiu,
ca certu preda sunu di rapina,
pi ricurdari a Lausu la to morti. -
Accussì dici e scaglia accuminatu
dardu ca ribummannu nta lu scudu
ammazza invece Antori ch'era accanto.

Nun sbagghia Enea ca ci l'azzicca giustu
sutta lu ciancu ed iddu in terra casca,
ma nun lu percia dopu cu la spada,
pirchè lu figghiu accurri e lu difenni.
Resta perplessu Enea pinsannu a Julu
e dici: - Granni é st'amurusu sensu
ca dimostri, o Lausu, ma resta arrassu
di stu to patri, ca cascavu in terra
e nun lu poi salvaru di la morti. -
Comu risposta lu picciottu attacca
Enea, ca si difenni e lu fa siccu.
Lu sacrificiu di lu figghiu duna
locu a li Volsgi di purtari in salvu
Mezenziu ch'é firutu. Quannu vidi
purtari nta lu scudu stinnicchiatu
lu figghiu mortu, lu feroci etruscu
ritorna in campu ad affruntari Enea,
sicuru di muriri, ca non poti
campari senza lu so figghiu mortu.
Mori Mezenziu c'addumanna sulu
di ripusari mortu assemi a Lausu,
mentri prosegui la battaglia a mari
cu li Latini c'attaccati sunu
di du' lati, pirchè surteru a massa
di lu recintu campu li trujani
e spingiunu cu forza e novu ciatu.